



**Eva Riedi e Martin Gabriel
èn cuntents cun ils resultats
da l'emprim inscunter cun
la grupa creativa.**

FOTO LR

Includer las Rumantschas ed ils Rumantschs

Project «Medias rumantschas 2019» – il proxim pass

■ (cp) La fasa d'inventarisaziun areguard la situaziun da La Quotidiana ch'è periclitada è terminada. Il schaner 2018 cumenza la Lia Rumantscha (LR) a sclerir ils basegns da las Rumantschas e dals Rumantschs areguard tut las purschidas publicisticas per rumantsch. Ils 6 da december ha gi lieu l'emprim inscunter da la «gruppa creativa» cun represchentantas e represchentants dad uniuns rumantschas che accumpognan il process dad eruir ils basegns. Plirs lavuratori cun participaziun da la populaziun duain furnir ulteriuras infurmaziuns fin il zercladur 2018.

A la radunanza da delegadas e delegads da l'october a Lantsch ha la LR preschentà ils resultats d'ina retschertga davart il diever da La Quotidiana ch'è periclitada en sia existenza. Ils resultats han servì sco punct da partenza per formular l'incumbensa dal project «Medias rumantschas 2019» che vegn purtà da la confederaziun, dal chantun Grischun e da la Lia Rumantscha. La finamira dal project è dad elavurar ina strategia per la purschida publicistica che vul includer tut ils meds da massa rumantschs.

Includer ils basegns da las Rumantschas e dals Rumantschs

Dal schaner fin il zercladur 2018 va il project «Medias rumantschas 2019» en in proxima fasa: la LR rimna infurmaziuns davart ils interess e basegns che Rumantschas e Rumantschs han en connex

cun infurmaziuns or dal territori rumantsch u en lingua rumantscha. Ils resultats vegnan rimnads, visualisads e publicgads cuntinuadamain sin la pagina d'internet da la LR. Il matg e zercladur porscha la LR ultra da quai en plirs lieus lavuratori cun participaziun da la populaziun per approfundar ils resultats. Las datas da las activitads planisadas e las dumondas, a las qualas i vala da responder, publicgescha la LR successivamain a partir da mez schaner 2018.

Da la nuscha a la turta da nuschs

Tge collia las Rumantschas ed ils Rumantschs? Tge elements stgaffesch identificaziun e rinforzan l'identitad linguistica? Las respostas a talas dumondas duain manar a constataziuns centralas per enchaminar la via a la finamira finala d'ina strategia da medias per tut ils meds da massa rumantschs. Sco simbol per l'identificaziun serva la turta da nuschs, ina pastizaria che vegn identifitgada fermamain cun il Grischun. Co èsi da maschadar il zutger, las nuschs e la groma per che l'emplenida da la turta gartegia?

L'ingredienza la pli impurtanta è bain la nuscha. Per quest motiv vul la LR rimnar durant ils proxims mais tantas nuschs sco pussaivel cun agid da la populaziun. Las nuschs duain simbolisar ils basegns individuals da mintga Rumantscha e mintga Rumantsch e vegnir duvradas per far ensem la pli gronda turta da nuschs rumantscha.

La grupa creativa sustegna la rimnada dals basegns

La grupa creativa che accumpogna e sustegna activamain la rimnada dals basegns è naschida or da la «maisa radunada» da medias che la Pro Svizra Rumantscha aveva inizià l'onn 2015 e che la LR ha manà vinavant. La grupa sa cumpogna da mintgamai dus represchentants da las uniuns regionalas da la LR (Surselva Rumantscha, Uniun Rumantscha Grischun Central, Uniun dals Grischs), da l'Uniun da las Rumantschas e dals Rumantschs en la Bassa, da la GiuRu, da la Pro Svizra Rumantscha e da la Pro idioms. Questas uniuns sustegnan l'acziun da rimnar ils basegns en contact cun lur commembers e durant lur activitads. Ulteriuras uniuns e societads han medemamain la pussaivladad da sa participar a l'acziun. La grupa creativa rapporta a la grupa directiva che maina il project «Medias rumantschas 2019». A chaschun da ses emprims inscunter ha la grupa creativa exprimi l'intenziun da cumpigliar tantas persunas sco pussaivel en la rimnada dals basegns. Entras il contact cun scolars, uniuns culturalas ed autras organizaziuns vul la grupa cuntanscher era persunas che n'èn betg commembras en uniuns rumantschas. En pli ha la grupa creativa discutà emprimas ideas concretas e datas pussaivlas per occurenzas da las uniuns participadas, a las qualas la rimnada dals basegns duai succeder.